

# CUSSEGL GROND

Sessiun da favrer 2023

## Dumonda Luzio concernent la surdada da lavurs per projects da construcziun auta dal chantun

L'ultim temp publitgescha l'Uffizi da construcziun auta ils mandats da planisaziun per projects da construcziun auta dal chantun Grischun pli e pli sco singulas etappas per lavurs da la planisaziun generala empè da pliras etappas parzialas tenor secturs specificis. Quai è vegnì fatg uschia ultimamain per la construcziun dals novs edificis Center administrativ sinergia e Center da la polizia stradala Sid sco er actualmain per ils projects per la construcziun d'in edificis cumpensatoric per il Center d'instrucziun da la protecziun civila Meiersboden e dal nov Center da scola auta spezialisada GR.

Grondas incumbensas singulas vegnan surdadas pli e pli a planisaders generals resp. ad interpresas generalas. Tras ina divisiun correspondentia da las etappas da submitsiun, avessan questas incumbensas però er pudì vegnir repartidas en pliras parts a pliras interpresas pitschnas e mesaunas.

Las interpresas pitschnas e mesaunas dal Grischun perdan uschia incumbensas interessantas dal chantun d'origin. Talas incumbensas van savens a purschiders da servetschs d'ordaifer il chantun, perquai che las interpresas chantunalas n'adempleschan betg ils criteris da submitsiun pervia da la grondezza da las etappas da construcziun e pervia dals differents secturs specificis.

Cun la moda da proceder actuala na survegn la mastergnanza indigena pitschna nagina pussaivladad da participar a talas submitsiuns. Tras quai na perdan las interpresas betg mo las incumbensas dal chantun, mabain er la schanza da sa mesirar ina cun l'autra, da sa megliar e da s'optimar.

Sut l'aspect da questas explicaziuns drizzan las sutsegnadras ed ils sutsegnaders las suandantas dumondas a la Regenza:

1. Per tge motivs na vegnan las lavurs betg publitgadas tenor singuls secturs specificis, mabain sco mandat general?
2. Co vegn fixada la divisiun da las etappas da construcziun e tenor tge criteris determinescha il chantun la grondezza da las etappas da construcziun?
3. Quants pertschient da las incumbensas da l'Uffizi da construcziun auta (incl. volumen da las incumbensas) èn vegnidas surdadas ils ultims onns a planisaders ed ad interpresas dal chantun Grischun?
4. Exista ina pussaivladad – en il rom da la legislaziun – da resguardar pli savens interpresas pitschnas e mesaunas tar submitsiuns chantunalas per edificis novs e per renovaziuns?

Cuira, ils 15 da favrer 2023

**Luzio**, Danuser (Cuira), Tomaschett, Altmann, Bachmann, Bardill, Biert, Bisculm Jörg, Censi, Claus, Degiacomi, Della Cà, Dietrich, Furger, Gansner, Gredig, Hartmann, Hohl, Holzinger-Loretz, Jochum, Kasper, Kienz, Kreiliger, Loi, Messmer-Blumer, Michael (Castasegna), Natter, Oesch, Rettich, Righetti, Roffler, Rüegg, Saratz Cazin, Schutz, Spagnolatti, Thür-Suter, von Tscharnier, Weber, Wieland